



## 煎豬油

官天光，阿公就去到阿京伯公个店面前，等等林阿厝來賣豬肉。屋下會無油好煮菜咧！阿婆昨晡日就吩咐阿公，講愛割一摺豬油來煎。阿公當聽話，打早就行到豬肉攤面前等等地，當驚無買著，兩手空空轉來賺分阿婆罵！

該載，阿公最早到。頭家林阿厝下下（ha` ha´）歸條剛好个豬肉，阿公就遽遽同佢講愛買三五斤个豬油。頭家切出一坵一坵大大坵个肥豬油，稱仔稱過堵好五斤，阿公買著歡喜到奈毋得，開容笑面，腳步輕輕，同大大摺、白白个肥豬油，帶轉屋下分阿婆。

阿婆早早就在灶下無閒。大鑊洗到淨淨，肚項燥燥燥，半點水就無，脣頭飯鑊肚走出香噴噴个味緒。雞油樹做大砧枋洗到淨淨俐俐，菜刀利利放在面項，就等等阿公拿豬油轉來。「銀妹，佢割豬油轉來哩啲！」阿公暢蹠蹠仔行入灶下，同一大摺个豬油交分阿婆。

接著豬油，阿婆無多講煞煞就同豬油放到砧枋，拿起利利个菜刀，切到一砵一砵像掙仔火盒一半恁大，放入大鑊肚煎。跼在灶空脣个佢，負責同杈仔、樵析、窿入灶空肚。火緊燒緊猛，油緊煎緊出，阿婆喊佢毋好跼在灶空脣，恁兼大鑊頭，驚怕分油彈著、燒著，佢就走到阿婆个屎肚尾。阿婆使等大鑊鏟，緊煎緊貶豬油，驚怕豬油煎到臭火爌。漸漸仔豬油蔭（im）過豬油砵，豬油砵定定仔浮起來，香香个味緒乜共下瀉出來。

阿婆先摻煎出來个豬油，一杓一杓舀入豬油盎。鑊仔肚就伸官有煎透、煎赤个豬油砵，一砵一砵過煎加一擺，煎到油砵變油渣，煎到豬油渣个香氣緊出，佢口涎水緊流，肚飢飢仔講「阿婆，佢愛豬油渣傍飯！」，阿婆看佢肚枵想食，就煞煞裝一大碗个飯分佢，飯面夾上幾砵仔搵過豆油个豬油渣，香香个飯、香香个豆油、香香个豬油渣，兩下半就扒入嘴空肚、溜入胃腸肚，香味對嘴空、鼻公衝（cung）啊出來。

該香香个味緒，深刻在吾童年个腦板，到今，阿婆煎豬油畫面，不時，還在吾个腦殼裡肚放影。

作者：邱一帆

### ☆詞彙學習☆

【一摺】id` kuan：用草繩串起，一手一提的份量。【一砵】id` kud：一塊。

【下下】ha` ha´：卸下。

【掙仔火盒】cud e` fo` hab：火柴盒。

【燥燥燥】zau´ zau´ zau´，音變為 zau´ zau` zau´：很乾燥。

【緊煎緊貶】gin` jien´ gin` bien`：一邊煎一邊翻面。

【雞油樹】gie´ iu` su：欒木。

【臭火爌】cu fo` lad`：燒焦味。

### ☆文法學習☆

【會無油好煮菜咧】voi mo` iu` ho` zu` coi le`：快要沒油可煮菜了。此處的「會」意為快要、將要，表示事情即將發生。

例 1：會落雨地，外背个衫好去收摯咧！（快下雨了，外面的衣服該去收起來了！）

例 2：佢會到哩，你再等加一下好無？（我快到了，你再等一下好嗎？）